



## Kristo Alijitwalia Asili ya Mwanadamu

**N**aye Neno alifanyika mwili, akakaa kwetu; nasi tukauona utukufu wake, utukufu kama wa Mwana pekee atokaye kwa Baba; amejaa neema na kweli. —Yohana 1:14.

Kama mtu anayelewa somo lake, Yohana anaonesha uwezo wote kuwa ni wa Kristo, na ananeni kuhusu ukuu na enzi Yake. Anaonesha mwako wa miale ya Mungu ya ukweli wa thamani, kama nuru kutoka kwenye jua. Anamwasilisha Kristo kama Mpatanishi pekee kati ya Mungu na wanadamu.

Fundisho la Kristo kuitwaa mwili wa kibinadamu ni fumbo, “siri ile iliyofichwa tangu zamani zote na tangu vizazi vyote,” hili ni fumbo kuu la ndani sana la utauwa. “Neno alifanyika mwili, akakaa kwetu.” Kristo alijitwalia asili ya ubinadamu, asili iliyo chini ya asili Yake ya kimbingu. Hakuna kiwezacho kuonesha tendola kujishusha hadhi kwa Mungu kama hili “aliupenda ulimwengu, hata akamtoa Mwanawe pekee.” Yohana anawasilisha somo hili la ajabu kwa ushahidi mkubwa hivi kiasi ili wote wapate kuelewa wazo lililowasilishwa, na kuangaziwa nalo.

Kristo hakuchukua hali ya ubinadamu kama kiini macho; aliichukua kwa hakika. Alikuwa na asili ya kibinadamu kwa hakika. “Kwa kuwa watoto wameshiriki damu na mwili, yeye naye vivyo hivyo alishiriki yayo hayo.” Alikuwa mwana wa Mariamu; alikuwa wa uzao wa Daudi kulingana na nasaba ya kibinadamu. Anatajwa kuwa mwanadamu, tena Mwanadamu Kristo Yesu. Paulo anaandika, “Kwa maana huyo amehesabiwa kuwa amestahili utukufu zaidi kuliko Musa, kama vile yeye aitegenezaye nyumba alivyo na heshima zaidi ya hiyo nyumba.”

Lakini wakati Neno la Mungu linazungumzia ubinadamu wa Kristo alipokuwa duniani, pia linaongea wazi kuhusu uwepo Wake kabla ya hapo. Neno alikuwepo kama nafsi ya Mungu, yaani kama Mwana wa Mungu wa milele, akiwa na umoja na ushirika na Baba Yake. Tangu milele alikuwa Mpatanishi wa agano, Yeye ambaye kupitia kwake mataifa yote ya dunia, Wayahudi na watu wa Mataifa, kama wangemkubali, wangebarikiwa. “Neno alikuwa na Mungu, na Neno alikuwa Mungu.” Kabla ya watu au malaika kuumbwa, Neno alikuwa na Mungu, naye alikuwa Mungu...

Mungu na Kristo walijua tangu mwanzo juu ya kuanguka kwa Shetani na dhambi ya Adamu kupitia nguvu za udanganyifu za muasi huyo. Mpango wa wokovu uliundwa ili kuwakomboa wanadamu waliopotea, kuwapa fursa nyingine. Kristo aliteuliwa kuwa Mpatanishi tangu mwanzo wa uumbaji wa Mungu, akisimamishwa tangu milele kuwa mbadala wetu na dhamana yetu. Kabla ya ulimwengu kuumbwa, ilipangwa kwamba uungu wa Kristo ungevikwa, ubinadamu. “Mwili,” alisema Kristo, “uliniwekea tayari.” Lakini hakuja katika umbo la kibinadamu mpaka wakati ulipotimia. Ndipo alipokuja ulimwenguni mwetu, akiwa mtoto mchanga huko Bethlehemu (The Review and Herald, Aprili 5, 1906).